

certissimis argumentis constat. Secundum est: causam humana natura præstantiorem humano generi ortum dedit; nam nihil potest per se ex nihilo emergere. Tertium est: a supremo rerum omnium Auctore nos hisce in terris positos fuisse, non ut nobis noceret, sed contra benefaceret, quod nobis constat ex omnis generis bonis, quibus nos circumdedit beneficissimum Numen. Quartum est: eam esse humani generis constitutionem, ut sine extremis malis homines muruis officiis carere nequeant; quis enim solus in desertis sine ulla ope humana parare sibi poterit subsidia omnia ad vitam commode degendam & facultates suas perficiendas necessaria? His præmissis postulatis, quæ in dubium vocari nequeunt, nunc fingamus omnia humanitatis officia sibi invicem homines exhibere, ita ut totum humanum genus amice conviveret non secus ac cognati iisque amicissimi vivere solent. Nihil videretur postea hominibus expetendum nisi ut morbis omnibus carerent, talisque vita æternum duraret, aut saltem, si amittenda esset, alia non deterior succederet. Hinc sequitur tot bona, quæ a Deo accepimus, omnia futura esse inania, nisi perpetua felicitate fruamur. Nam quamvis bonis omnibus, quæ in hac vita mortali possunt comparari, frueremur, quando iis carentibus esset & moriendum, tunc temporis præterita omnia bona veluti in venenum conversa nos acerbissime cruciarent, Jam vero si moriendum esset sine ulla spe futura post hanc vitam beatitudinis; beneficium opti-